

Cu inversion di 120 miyon

Waf di Barcadera lo bira un esunnan mas moderno den nos region

ORANJESTAD – Cu un inversion di 120 miyon e waf di Barcadera ta transforma su mes den un di esunnan mas moderno den region ora e keda cla.

E waf aki lo por procesa barconan grandi y den un tempo mas cortico compara cu awo. Asina tambe lo tin circulacion di placa cu ta bon pa economia di Aruba.

Crecemento economico

E trabou cu ta wordo haci parcialmente door di APA y sub contratistanan local ta bay genera hopi cupo di trabou. “Hopi pais no tin un crecimiento economico cu cifranan impresionante asina,” Prome Minister Mike Eman a splica.

A caba di cuminsa

Algun siman pasa e trabounan na waf di Barcadera a inicia pa pronto acomoda e containernan cu ta awor na waf di Playa. Na waf di Barcadera ministernan Eman y de Meza a haya un amplio splicacion di parti di director di ASTEC, Mike de L’Isle, kico tur ta tumando luga y a muestra nan tambe riba e responsabilidad di nan mes, di APA y e sub contratistanan cu ta envolvi den e proyecto grandi aki. Un proyecto cu despues di hopi obstaculo a inicia.

Ta un necesidad

Eman na e ocasion ey a bisa cu e waf di container ta un asunto hopi necesario, pasobra cu Aruba mester los e waf di crucero di esun di container. E iniciativa aki a

haya masha bon acogida cerca comerciantenan cu ta sostene e mudamento completamente. Un di e motibonan di e necesidad di dos waf cu cada un nan propio direccion ta tambe pasobra cu e waf di carga a crece e ultimo añanan y ta sigui crece so. Hibando e waf di container pa Barcadera pa e por sigui crece y na mes momento crea un desaroyo industrial den e area di Barcadera ta e enfoke. Na Playa e enfoke lo keda riba turismo crucero y embeyecemento di e area.

ASTEC

Aruba Stevedoring Company (ASTEC) N.V. ta hunga un rol evidente den maneho di Gobierno pa muda waf di carga pa Barcadera. Mien-

tras cu Aruba Ports Authority (APA) N.V. ta e autoridad di waf, ASTEC ta e compania operador di carga. Den e proyecto di mudamento di e waf di carga pa Barcadera, ASTEC ta e inversionista encarga cu construccion di e infraestructura riba tera na Barcadera.

Infraestructura

“Nos semper ta busca pa sigui e vision di pais Aruba, y un parti di dje ta pa nos ta mas duradero posibel. Nos a haci un estudio con nos por haci esey y a yega na un proyecto di solar panel,” D’Isle a splica. Ta bay pone mas tanto panel solar posibel riba dak di e edificacion cu ta wordo construi na Barcadera, tratando di yega na 150 pa 200 kilowat-

tuur cu ta un cantidad considerable. Importante den e plan di Gobierno di Aruba ta pa crea un solo waf di carga na Barcadera.

Ta p’esey mester bin cu un bon coordinacion pa haci bon uzo di e servicionan di haf durante henter siman. Esaki ta importante, pasobra ya caba gerencia di tanto APA como ASTEC ta hayando hopi pregunta riba e plannan di e waf di Aruba. Por ehempel, tin demanda pa baha cierto cantidad di container na Aruba prome cu nan por sigui pa nan destino final den region. Esaki ta un servicio nobo cu waf di Aruba por brinda.

E waf moderno cu Aruba ta haya ta crea diferente oportunidad nobo pa comercio na Aruba. □